

ZION THUSUAK



REVIVAL CHURCH OF GOD (RCG)

Vol. XXVII

SEP - OCT 2023

No. 141



THUPI:

“Lalpa a chun kipak zingun, ti kit ingka, kipak un”.

Phillipi 4: 4

Editor: Rev. Dr. Khupkam Vaiphei

ZION THUSUAK

Editor:

Rev. Dr. Khupkam Vaiphei

Associate Editors

1. Rev. Liante
2. Rev. Ngulneipau

Contributing Editors:

1. Mr. Kh. Sang Vaiphei
2. Rev. Kailum

Board Members:

1. Pro Pastor Lianboi
2. Upa Khailiankham

NOTICE

Zion Thusuak article zosia hi thugin lam thu ah editorial board ten maw pawkna akinei puan, article hun piate mawpuakna ah kawi ahi ziakin dawtnawp a um chun, amau dawtzawk dingin ka hun genchian uh a hi.

By: Editorial board ZT

A SUNGAH THU UM TE

	<u>Page No.</u>
1. Editorial	01
2. Ngaidam a pawimaw dan	02 – 04
3. Mitthi pum ah pauchap ding in Pathian in ei ko hi	04 – 05
4. Gitlona Bul (Origin of Sin)	06 – 08
5. Hukhinna lehThilpha hi	09 – 12
6. Pathian tawh kinai ah um (Intimacy with God)	13 – 16
7. Hilltown RCG Kochuam Reportna	17
8. Kipak thu genna	17
9. Hetsakna	18
10. ZT Life Member	18
11. ZT Patron Member te	18
12. Zion Thusuak Magazine Agent List	19
13. Photo Section	20

Editorial... ✍

Zion Thusuak simtute zosia amasan Lalpa Jesu min in chibai'

ZT September-October issue sua kit thei dinga damna leh hunpha ei pia tu Pa Pathian chungin kipak thu igen uh ahi.

I Gam uh buaina hi bangtik chan ahi ding kuaman kihelo ahi ziakin i malam u hi haksatna ngen hung hithei dingin a umta, Israel chaten haksatna leh gentheina melma te khut a pat ala tuak hun lai ua Lalpa Pathian abel ua akianga kipiaklut in maicham te ala siam ua, tichun zia amaicham teu le adawtna teu ala hiat piak hun tak le amelmateu azaw gual ua khan ei unle tu haksatna leh buaina hun ahin Lalpa Leileh van siampa thunei chungnung penpa bep suanga ibel lou uale, bangma ibawl thei diu le genthei ding umlo ahi ziakin, i umna mun chiat un thada lou ah Pauchapzing hitiu in, Pathian ama ngei in i Galteu chu ei dou piak ding ahi. 2 Chro.20: 1-30 chan hi ala sim in.

Bible ah Juda te Leng Jehoshaphet kha Moab leh Ammon miten ala dou guat lai ua khan Lalpa Thagau chu Jahazel chungu chun ahung tungta, hiti hin atia, "Zia mipi tamtakte hung kuan ziak a hin lungdawng ki unla, lau le lau diak ki un, zia kido na di hi nangmau do ding hi puantin, Pathian in hun do zaw ding ahi." Ati ahi. 2 Chro.20: 14-15. Pathian Thagau in ziagual thu ahun gen ma khan Israel mipi te khan Pathian ma in Anngawl in Pauchapna ala nei uh ahi, zia apauchapnau leh akilatnau kha Lalpa'n ahiatpi ziakin ziagual khan amelmateu kha amau in do lo in Lalpa'n ado in azaw piak ta ahi. Lopina Lalpa chang ta hen.

Tuhun inle Imelma teu Lalpa'n eizaw piak theina dingin Anngawl ah pauchap hi apawimaw tak tak a hi ti hethak kit hiti in Pauchap thak hitiu unaute. Simtute Zoasia Lalpa ang ah kipia lut ah Pauchap thak zel thei dingin hun Lalpa'n hun malsawm ta hen. Amen.

NGAIDAMNA APAWIMAW DAN

By: Rev.Dr.Khupkam Vaiphei

Bible simding Marka 11: 24-25. “Zia ziaka chun, ka hil la hiu, thil la dawi ua, la pauchap tak ua leh mu ding ah ginna nei tak in um leuchun mu mai di la hiu, Chuleh, pauchap ding ah la din tak ua leh, mi ngaidam kul la nei ualeh ngaidam phawt leuchun, ziatak chuleh la Pau van ah um chun nang uh le la hi khialnau hun ngaidam di ahi. Himaleh, nangmau in le la ngaidam lo ualeh, la Pau van ah um chun le la hi khialnau hun ngaidam lo ding ahi.”

Zia bible chang hi i sim in hawideu in i ngai tua le, ginna nei takah pauchap ten athil dawt u chu mu ngei ding ahiu ti ahi, ahinla Pathian kianga i Pauchapna i thil dawt ding te muthei na dingin i chungah thil hikhial te ngaidamna i nei lo ahile Van ah um Pathian inle ei ngaidamlo ding ahi ziakin, Pathian in ei ngaidam lo chun, i thil dawt te le ei pialo mai ding ahi ti zia thu ahin aki mun, nang in bangtin la gel em?

Khrista ngaidamna changloten, kumtuang hinna le changlo ding ahiu ti ahi. Jesu’n “La chung ua thil hikhialte la ngaidam uale, la Pau van ah um chun, nang uhle hun ngaidam ina, Himaleh, nangmau inle la chungua thil hikhialte la ngaidam lo ualeh, van ah la Pau chun le nangmau thil hikhialna chu hun ngaidam diak puana.”(**Mathai 6: 14-15**). Ziatak ah ngaidamna hi, min thupha ahun chawziak a ngaidamna hilo in, bangma thupha chawina him umlo ahle condition umkei lo ah Hepina zia a ngaidam theina hi ahi Jesu’n ei haw eila ngaidamna kha. Bible Mathai 18: 23-35. na a chun Jesu’n tekhn thun anungjui mipi te ala hil in ahi. “Van gam chu Lengkhath in asuakte sukdik ding a guat gual ahi atia, nikhat hi Lengpa’n a suak khat kiangin a bat te ditna dingin azi a cha te leh anei zosia zuak ah abat sangsawm ahun dit dingin thu apia, zia phat a chun, zia suakpa chun alengpa kiangin a bawkkhup ah adawn ngut ngut ta, hepu ka chungu zangai inlang, phat chawmkhat ei ngak inlang alengin hun dit suak guangka atia, phat a chun, Lengpa chun alungsiat ma ma in, abat zosia chu a ngaidam ta, suangkul ah khum ta lo in atha dawk ta ahi, zia zaw a chun, zia suakpa chu apawt ah alawite khat ama sumba hi asikha ama chun dangka

zakhat ala bat ahia, amu phat phatin a gawl in aman ah abat dit dingin a naw ta, a suak chanpipa chun le, suapi, phat chawm khat eingak inlang, aleng in hun dit suak guang ka ati ta, himaleh ama chu a nuampua, abat adit zaw masia suangkul ah um dingin ava khum ta ahi. Zia thu hi Lengpan aheth phat in zia suakpa chu ako in, nang suak nunsia pa, nangin leidawt ngut ngut zia ah la bat zosia ka ngaidam in, nangin la suak chanpi ken ka hun ngaidam gual ah ngaidam zolo lahi le, lei bat zosia la dit zaw masang sian suangkul ah um ta ding la hi tin, Lengpa chun zia a suakpa chu mi sugenthei te khut in apia dawakta ahi. Ziagual a chun, nangmau inle la suapiu la chungua thil hikhial te chu lungthim gil ah pat la ngaidam lo ualeh, van ah ka Pa chun le nang uh hun zuti bawling ahi, ati ahi.” Lalpa Jesu ngaidamna chang ah van mi hina neita la hi chun, nang inle mi vak ngaidamna piak chu haksa salo ding la hi tile muthei ahi. Mi la ngaidam lo chun, Lalpa la chungua lungna’n tin alungnatna chu la chungin hung tung le thawkzaw ding hilo ding ahi. Tu a hun pet in mi’n la chungua thil ahikhialte ngaidamna la piak thei ahi chun Lalpa kipak ding ahi.

Ngaidamna hi taksa leh thagau ah damna ahi ti aki chian in, ei gingtu ten bawlingah kilawm leh pha chu i chungua thil hikhial te vak ngaidam zaw na hi ahi. Nangma leh ki ngaituan lang, min la chungah bang thil abawl khial ziaka mi la ngaidamlo, la mu nawplo a um em? A um khak chun, khrista min ah ngaidamna chang dingah kilawm lo hita ziang maleh ngaidamna vaknei thei le chun, ziagual ngaidamna la nei hun in bang gual lunggel la chungin ahung tung em hechian thei tanla. Bangkim chu Pathian thagau panna lo in vang bawldaw thei ding gual chu hilo ahi. Ahinla, Lalpa Jesu’n ama kianga thildawi neiten adawt lai un Ama Jesu’n ngaidam taklo migilote eingai dam gual ah ngaidamna mi pialo te chu athil dawt teu mulou ding ahiu ei ti hi ngun tak in ngai tua ah i melma tiangah ngaidam ngai ahi ti eimu sak in ahi.

Mihiam in haksa asak pen chu melma i chungah thilsia bawling te condition umlo ah vak ngaidam ding hi ahi. A hinla, ziagual ngaidamna chu Lalpa Jesu’n a dawling ahi ngalah. Tuni zia thu kigen hi ngun deu in ngai tuan la, thil dawling leh ngai la nei ah, la ngaichat a um chun, midang chungua lungnatna, lungawi lona lanei te Lalpa Jesu thupiak gual in

ngaidam inlang, zaw phat le ama Jesu kiangin chian la, la daw i la ngai te dawn le chun hun pia ngei ding ahi ti taksanna nei ah Pauchap thei ta ding la hi. Ziagual a chun, Lalpa'n nangma le hun umpi in hun hihat ta hen. Amen.

MITTHI PUM AH PAUCHAP DING IN PATHIAN **IN EI KO HI**

By: Upa Lalboi, Youth Hostel

Pathian in Joel mangchan amite kiang in, Ahinla, tuhin le Lalpan la lungthim zosiau in anngawl ah kap leh lusun kawm in ka kianga hung kihei kit un, (Joel 2:12)

Aman Christian puitute le amite a ding ah mitthi luang a pauchap ding in ako hi.

(Joel 2:17) na'n, Lalpa nasem thiampute le maicham leh hulliap kikal in kap tau hen, Aw Lalpa, lamite hawi inla, la gochante nuijat buk leh namdang te gensim din siam kin. Bangziak ah nam dangte lak ah, a Pathian uh khawi ah um atom? Ti ah a um ding ti tau hen. Pathian in mitthi a hia, chun a tepte bawh hi. (San 56:8) na'n ka mitthi hih la savun peng ah thun in aw, la tepte na lekhabu a chun a umna hilo ahem? Lungthim a puakgik aveina nasatak, titak zet a Pathian kianga kiko (Pauchapna) chu mitthi luanna sang inle agasua zawi, khawvel gawtmun zuan ah a chialai a ngaisaklo chu Thagau lam a tualthana tawh kibang ahi. Khawvel gitlona leh nat thuak ah aum zing lai a, gingtute mitthi lah pawt talo, puakgik lah nei talo a, dan pangai a pauchap hin Thagau lam a thil hikhial na thupi tak ahi, Gitlona'n asuksiat zing laite, puksete a ding a lainatna puma mitthi tawh pauchap piak na chu Khrist dawidan leh ama lunglam ahi.

Pauchapna chu ki chawldam thei ding dan ahi pua, Khrista gam a dinga isep ding thupi pen ahi. Pauchapna hi lungthim na ngawi ngawi puak kek a Pa Pathian tawh Khrist thiampu chungnung leh Thagau thiangtho, mite hepitu kizawp khawmna chu ahi. Mitthi pum a Pauchap na hin kumtuang a dinga thil kawi he na ahia, mitthi puma Pauchapna chun kumtuang a dinga Bulak dinga mitthi puma chi i tuu ahi. Puakgik veina taka Pauchap na chu Van a a um hi ti i hiat chian gual un, mitthi pum a Pauchap piak na chu Pauchapna thil hi theina pen ahi.

Mitthi pum a tute chun kipak tak in at intin uh kap puma buchi pawtpite chun abuphal teu chawi in lim tak in hungkit inau. (Sam 126:5-6) Pauchap ziaka mitthi luan ding zakcha him him kin, la Pauchapna ziaik in Thagau Thiangtho in a thak in na ahung sem sek in ahi, mitthi hin mimal lungthim ngaituana hat tak leh thil hitheina a su lian deu deu hi.

(Jer. 13:17) ka mit chu thasia tak ah kap in mitthi tui in luangthana. (Ka Late 2:11) Ka ka na'n ka mitthi tui a kang hial tai, ka bupi le akichok a, ka mite hisiat ahi ziaik un, nausen te leh naupangte chu kotzing tin ah thidang ah a um zo tak ziaik un, tuni itaksap lian pen chu, mi leh sum leh pai hilo in, Pauchap na ahi. Khristian nasemtu leh sum supung lo in, pauchapna khansak leu hing inasep nau in ga tamtak sua zaw ding ahiu.

Pauchap na hi Kochuamte hatna bul ahi. Pauchapna hi Khristian ihi nau ah Lalpa lampi ding isiam nau gasuana dinga thil hitheina mutheina um sun chu ahi, Pathian kiang ah pauchapna hi la hithei sun, hilo in la hithei thil thupi tak pen chu ahi zawi. Pathian cha hatlo pen pen le khupdin ah apauchap Setan in amu chun aki thing mai ahi. Pauchapna hin i Kochuam sung leh gamsung zosia veina chiat din Lalpan ei malsawm taken.

GITLONA BUL (Origin of sin)

By: Pro.Pastor St. Lianboi

THUMAPUI: Amasan gitlona bul, tithu thupi mangcha holim thei ding a, i um ziak u hunpha eipiatu Pa Pathian lopina chang taken, Article masa iholimnau a khan mihingte chung ah hung tung ta, taksa thina, Thagau thina leh kumtuang tiang thina, tithu ala holim tau in, tuni iholim na diu thupi ahileh gitlo chawnsiat hi khawi apat hung um dawk thei ahem? Ti holim ding ihi ziak un, simtu zosia i phatchuam pithei chiat na ding un, Lalpa'n a thu ei malsawm piak taken.

A. GITLONA BUL HUNG KUAN DAWNA:

(i). Awle gitlona bul tithu ahung kuan daw dan chu, atil apat in Pathian in, thil zosia a siam na lak ahin, gitlona chawnsiatna, leh a thiango ti haw hi, ala siam puai, a thilsiam zosia hi, apha chiat a hawi chiat a thiango chiat ah a siam vek ahi. (Gen. 1:4, 10,12,18,21,25). Achuti ahileh, gitlo chawnsiat chu khawi apat ahung pawt a, bangtin hung um dawk thei ahem?

Bible thiam haw ei kaw k mu dan un gen mai hitiu, Pathian thil siam, vansawlchak thiango hawlak ah, ama nuai tak ah a kawi a hawipen a lianpen, apipen, cherub, zingsawl aksi, zinglam chapa.(Eze 28:14) Mihiam te pau in (Son of the morning) “LUCIFER” a tiu chu ahung hi tai.

(ii). Lungthim leh bangkim enchiantu, hesuaktu chu Pathian ahi. (Jer. 17:10, Rom 8:27) “LUCIFER” LUNGTHIM IN, Pathian a dekna lungput zosia leh gitlo chawnsiat lung anei zosia chu ahung mudaw ahi tai. (Is. 14:12-14) amudaw kiletsakna leh kichaposak na kam change chu:

- a. Van ah kalto ing ka tin, Pathian Aksi chung ah ka Lalchutpha kawi ka tin.
- b. Tang thiango sangpen ah mite chung ah Lalchutpha ah kitung ding ka hi.
- c. Sum chung ah kalto katin, chungnung pen ah um ding ka hi.

Zia chapona kam cheng, Pathian dekna thu ala gen tak zia ahin, Pathian lungnatna a chung in a tun tak zia in, Michael leh aa vansawlchak ten ahung do ua, lei chung ah ahung nawthak uh ahitai. (Rev. 12:7-8) Hallelujah Lalpa lopina chang taken. Suapite haw, Paul in Ephesus mite kiang ah a gen gual in, nite hi apha ta puai (Eph. 5:16) tia agen hi. A chute ahileh, chapona kiletsakna te lak ahin, kikhin kang tai tui, zia haw hin ei simpha puan, siatna leh kilikna ten ei tun khum sek zawk ahi. (Prov. 16:18)

(iii). SETAN (LUCIFER) PAN LAK KIPATNA: Setan in khawvel ah gitlo chansiat a hung bawl daw thei na ding a chun, Adam chu a thep thak a ngai tai. Chuleh, Adam chu a thep thak na ding a chun, Evi chu thep thak masat a ngai kit tai. Evi thep thak na ding a chun, ganhing lak ah dawha thukpen Gul chu amatchak angaikit tan ahi. Ziaziaakchun, Setan LUCIFER chun Gul chu ahung mangcha, Evi ahung them pan tai. (Gen. 3:106) Gul chun Evi kiang in, zia sia leh pha hetna thingga hi ne le chunle, thilo hial ding la hi, la nek leh ama gual taw bang ah, la hung chit ding chu Pathian in aheth zia ah ne kin ati ahi; ati piak leh, Evi chun, Pathian thu sang in Setan (Gul) thu chu a ngai sang zawk zia a, anak ahi tai. A umpi a pawsal le apia, a ne tai. (Gen. 3:6)

(iv). Suapite haw, nangma hung them ding achun, Setan in bang ahung mangcha diam? Kuaman ahe masa puai. Himaleh i chung ah hung tung umsa ahi zia in ahung phat leh thep thak ah la umlo na ding in. (Eph. 6:11) na, Pathian galthuam ki thuam in ala pang in, chutileh, galzawna chu chang ngei ding ihui Lalpa lopina chang taken.

B. GITLONA LEH CHAPONA GA HAW:

(i). Setan (LUCIFER) apat in gitlo chawnsiatna ahung kipan a, Paul in Korinth mite kiang in mihing masapen Adam atia (1.Cor. 15:45) chuleh Rom mite kiang ma in, mi pakhat sukkhial zia or thu oilo zia in thina'n vai ahawm tai, atikit ah, zia haw zosia hung um daw na hi Setan (Lucifer) nasep zia ngen ahi zia in, Pathian in gawtna sangtak ahung pian, Van apat ahung nawthak chu ahung kipatna

ahi. Van nawpna leh thaunu Cherub khat ahina alopina leh amel hawi na zosia akimat sua ahi tai. (Eze 28:14-16)

(ii). Leisiat chung ah Pathian melma lianpen van ah umna ding neilo, mun chang zolo Gitlo chawnsiat hung kuan dawna bul tin het ahi tai. (Rev. 12:7-8)

(iii). Babylon Lal Nebukadnezzar chu, Lal inn chung achun avak vel ah, “Babylon khua thupi leh hawi tak hi, ka Lal inn um na ding leh ka lopinan suklat na ding ah ka khut ngei ah ka diamdaw hilo ahem?” ti thu genzo manlo in, van apat awgi chun “Aw Lal Nebukadnezzar nangma ah kipat in la Lalgam chu lakmang ahi tai. La mite a kipat nawdaw hin la tin, gam sate lak in cheng in latin, gancha gual in hampa ne ding la hi, mihingte lalgam chung ah, thuneitu leh a dawichuamte lalna piatu chu la hiat leh la pawm masi kum (7) hun sagi sung chu bawngchalte gual ah hampa nek sk ah um ding lahi. (Dan 4:28-33)

(iv). Zia gitlona bul ti thupi nabgcha i gen buam na pen uh chu, gitlo, chawnsiat, chapona, kiletsakna, haw hi Pharisai pa Pauchapna (Luke 18:10-11) nan le i he tau in, Pathian tawh ki gamlat na chuleh, article masa ila holim uh, taksa thina, Thagau thina, leh kumtuang thina, hung tun na ziak leh, zia chapona ki ngai sanna, Setan (Lucifer) lungthim put apt ahi ti, ihet kham kham ah i gen dawte hi, Lalpa'n a thu eimalsawm piak ta hen. Amen.

HUKHINNA LEH THIL PHA HI **(Salvation and good works)**

By: Rev. Liante Vaiphei

“Lungsiatna zia ah ginna ah chun hukhin la hi ngal un; zia chule nangmau ah pat pawt ahi pua, Pathian thilthawn piak ahi. Thil hi zia ah puai, chutilochun mi’n suang kha’nau. Thil pha hi ding ah Khrista Jesu ah chun siam ah um in ama khutsuak i hi ngal ua; zia thil pha hi chu i khawsak dan ding ua Pathian in a siam khawl ahi” (Ephesa 2:8-10).

Thumapui

“Hukhinna leh thil pha hi” ti thupi ah hin ngaidan/ gindan diklo gen khak in ala um sek hi. Zia a diklo te lak ah khenkhat chu: pakhatna in, hukdamna/ hukhinna chan thei tak tak na ding ah chun Jesu’n khraws chung ah a sep bakah thil pha i hi belap uh a ngai hi ti ahi. Zia gual gindan ah pat hin hukhin la hi leh hilo chu la ki het chian thei tak tak lo ding ahi. Aziakchu, hukhin ki hetchianna ding ah chun la tit leh titlo etdikna di a um lo zia kin. Tichun hukhinna la chan thei na ding ah chun thil pha la bawl be jel a ngai ding ahi. Zia gual gindan leh ki ziltilna nuai ah um te chun Paul in Ephesa 2:8 na ah, “hukhin la hi ngal un” a ti kha a ti thei lo ding uh ahi. A panina in, thil pha hi leh hukhinna hin kitimatna a nei puai ti ahi kit hi. Zia gual ngaidan apat a kiziltilnau chu lungsiatna zia ah ginna zia bep ah hukhin i hui a, mi’n Jesu Khrista chu a hukdamtu ding ah pawm ziang maleh, a hinkhua ah thil pha hi in a zui khel akul puai ti ahi. Chuleh, a pathumna in, Jesu min ah baptisma la chan lo leh hukhin hi pua’n la ti ahi kit hi. Zia chu thil hi/nasep ziaka hukhin ki hi ahi ti’a ki ziltilna gual ahi kit hi. Tui ah baptisma chan hi holam thil ah kin kibawl (ritual) a hia, baptisma chansakna kin (baptism service) chu nasep/thil hi ahi. Himaleh Bible in, “Lungsiatna zia ah ginna ah chun hukhin la hi ngal un...Thil hi zia ah puai” a ti ahi. Zia a chung ah ngaidan, pawmdan ahiloleh gindan ki gen te hi a dik em? ahiloleh Bible in ei ziltilna tawh a kituak em? a nuai ah gual ah hin vak en hi tiu.

1. Lungsiatna zia ah ginna ah chun hukhin i hui.

A. Thil pha i hi ziakua kuama'n hukhinna hi i lawdaw thei uh a hilo ahi.

Ephesa bung 2 chang masa pathum te ah chun mihing nungchang umdan leh thagaulam dinmun kichiantakin Paul in a gen hi.

1. Lungnatna chate a piang i la hiu.
2. I pianpi hindan hi i theng danglam thei lo uh ahi. Jeremiah in, "Ethiopia mi chun a vun uh theng in, gialbem inle a ziau a theng thei awm? Chuti ahileh, nang haw thil phalo bawlwawngsak te hinle thil pha bawl thei tho ding la hiu chulam" (Jer. 13:23) ti'n dawtna a la bawl hial ahi.
3. Peter in zia khawvel buaknate ah kipat ala kigawlmang te chule zia buaknate ah chun a kilekit sek ui a ti ahi. "Zia Thupil hi a chung un a dik mama hi: "Ui a luak lam in a chia kit hi," ti leh, "Vawkpi kisil thianga le buanthuak lak ah kibual ding in a chia kit hi," ti hi" (2 Pet. 2:22; cf. Prov. 26:11).

Bang ziak ah zia gual ah chu um sek a hiu em? Aziakchu, zia chu a pianpi hindan uh ahi ziaakin. Ziaziakahchun, Lalpa Jesu'n, "La pianthak ngei ngei di ahi" (Johan 3:7) a ti ahi. Hindan thak la nei ngei ngei di ahi tina ahi. Paul in, "Ziaziakahchun, kuale Khrista ah a um chun thilsiam thak a hung hi tai" (2 Kor. 5:17) ti'n a gen a. Chuleh Peter in, "Mangthai ziang thei ding chi sethei lak ah hilo in, Pathian Thu hing zing leh um zing dungzui ah piangthak la hi tau a" (1 Pet. 1:23) ti'n a gen hi.

B. Hukhinna hi Pathian ah kipat thilthawn piak ah i chan uh ahi.

1. Hukhinna hi Pathian hepina ziak ah a Chapa ei piak i ginna ziak ah ki chang ahi. "Pathian in khawvel a hepi mama a, chutichun a Chapa changkhat neisun chu a pia ta; ama chu kuale a ging taphawt mangthai lo ah, kumtuang hinna a nei zawk na ding un" (Johan 3:16).
2. Hukhinna hi nasep phat/ thil pha hi ziak ah lawdaw thei ei puai. Thilpiak hi lawdaw thei ahi pua; ahinla, law/lawdaw chu sepman tina ahi.
3. Hukhinna hi mi gilo in a lawdaw thei lo ahi. Mi zosia hi mi gilo i hiu (Rom. 3:23; 5:12). Gitlona in a lawdaw chu thina ahi. "Gitlo man chu thina a hi'n, Pathian thilthawn piak ahileh vang chu Jesu

Khrista, i Lalpau zal ah chun kumtuang ah hinna (hukhinna) ahi” (Rom. 6:23).

4. Hukhinna hi Pathian in ei bat ahi puai.
5. Hukhinna hi a changtak i hi ziaak ah ki chang ahi puai.
6. Hukhinna hi i ki hawldawu ahi puai.
7. Hukhinna hi lungsiatna ziaak ah Pathian in ei thilthawn piak ahi.

C. Hukhin i hinna hi i thil hi ziaak uh ei puai.

1. Paul in, “Thil hi ziaak ahi puai, chutilochun mi’n suang khan’au” (Eph. 2:9) a tia.
2. Chuleh, Abraham kha a “thil hi ziaak ah midik ah kisiam ahileh kisuanna ding a nei ahi; ahi’nla Pathian lam ah vang a nei puai” (Rom. 4:2) a ti ahi.
3. Thil pha hi ziaak ah hukhin i hithei leh i thil hi chu i ki suanpi thei di tina a hia; ‘maleh Bible in hukhinna hi thil hi ziaak ahi puai; Pathian lungsiatna ziaaka Jesu Khrista ginna ziaak ah ki chang ahi a ti ahi.

2. Pathian khutsuak i hui.

Pathian khutsuak in lalna nasatak a nei hi.

1. Mihingte hi Pathian khutsuak i hui (Eph. 2:10).
2. Khristiante hi thil pha hi ding ah Pathian siam i hui (Eph. 2:10).
3. Thil pha hi chu i khawsak dan ding ua Pathian in a siam khawl ahi (Eph. 2:10).
4. Damaska khua dai kiang ah Jesu, Paul kiang ah a kilak ah kha, a Chanchinpha nasem ding ah a siam/matchak nawp ziaak ahi. Tichun Jesu’n Anania kiang in, “Chia mai in; ama (Paul) hi ka belguat, Jentelte leh lalte tawh Israel chate kiang ah ka min pawluttu ding ah ka tel ahi. Ka min ziaak ah bang gual gentheina a hem a thawk di a kiang in hun hiatsak di ka hi” (Nasepte 9:15-16) a ti ahi.
5. Paul in, “Ka nu gilpi sung ah kipat ei la khenchuam pa leh hepina ziaak ah ei ko pa Pathian chun, Jentelte lak ah a Chanchinpha ka gen thei na ding in a Chapa chu lungdamtaka keima ah a kilatsak lai ah khan” (Gal. 1:15-16) ti’n a gen hi.

3. Thil pha hi ding ah Khrista Jesu ah chun siam ah um i hui.

“Thil pha hi ding ah Khrista Jesu ah chun siam ah um in, ama khutsuak i hi ngal ua; zia thil pha hi chu i khawsak dan ding ua Pathian in a siam khawl ahi” (Eph. 2:10).

1. Pathian nasep/thilhite haw hi a pha, aziakchu a siamtu hi a phat ziakin.
2. Pathian chu a hindan ah a pha, ziaziakchun ama ah kipat hung suak zosia chule a pha ahi.
3. Tuni thil pha i hi teu hi Khrista ah hinna thak i nei gau ahi.
4. Pathian in hinna thak ei pia, zia hinna thak chun thil pha ei hisak sek ahi.
5. Thil pha hi in mi a phat sak thei puai. Pathian in a Chapa ah chun mi pha’n ei siam ah, zia phatna chun thil pha ei hi sak ahi.
6. Thil pha hite hi eimau ah kipat pawt ahi pua, chun i phatnau ah kipat pawt le ahi diak pua, ‘maleh Pathian hindan (nature) eimau ah um ah kipat pawt a hia, zia chu Jesu Khrista ah hinna thak i nei nau ah kipat pawt ahi.
7. Thil pha hi ding ah Khrista Jesu ah chun siam ah um i hiu.
8. Zia ziak ah chun Jesu’n, “La thil hi phatteu chu mu’n ti un, van ah la Pau chu chawihawi thei in’au” (Mtt. 5:16) a ti ahi.

Thukhakna

Pianthakna ahiloleh hukhinna dik in thil pha hi a suadawk sek a. Thil pha hi ziak ah hukhin i hi puau a, ‘maleh thil pha hi ding ah hukhin i hiu. Ziaziakchun, thil pha hi chu hukhinna hilo in, hukhin hetchianna ahi zawi. Mi kua’n le hukdam/ hukhin ka hi tai ti ngal ah, ‘maleh a hinkhua ah danglamna umlo ahiloleh thil pha hi in a zui lo chun, zia mi chu hukhin ahiloleh piangthak ahi tak tak lo ziak ahi ding ahi. Himaleh hukhinna chang te chun thil pha a hi tei sek uh ahi.

PATHIAN TAWH KINAI AH UM (INTIMACY WITH GOD)

Pathian chu nai un; tichun, ama'nle hun nai in a. Jakob 4:8a
Kei â dingin vang, Pathian nai ah um hi a pha ahi; LALPA PATHIAN
chu kihumbitna'n ka mang hi, la thilbawl zosia chu ka gensawn theina
dingin. Sam 73:28

By: Kh Sang Vaiphei

Pathian hi chunglam pek pek gamla tak ah um hilo maleh, a chang leh hopi phaklo gamla tak ah um guala I gel kha sek uh hi. Ama gamla tak ah um ahi pua ei un I gamlat zia kha ahizaw sek hi. Pathian tawh kinai ah um atep khate ding in a nawp dan gentheilo, genchian theilo ahidan a kichian ma ma hi.

Jesu'n a telchuam nungjui pathumte laka Peter kha **mêl danglamna tâng** a khan nuam a sak ma ma zia kha in Jesu kiang ah baw pathum sak ding ala don hial ahi. **Emmau lampi** chia nungjui panite khanle Jesu tawh kiton ah holim khom kha nop a sak dan uh a gen uhi (Lk. 24:32). Lalpa Jesu tawh kipawlte chun a nop puai tina ding him him a nei ngai puau.

Zingkal ah devotion la nei hun in, “a nuam na lom lom e! Lalpa tawh kipawl chu lungmuan leh a thadam um na lom lom e!” ti ah nang leh nang la kiho hun um sek ding in ka gingcha ahi. Zia gual hunte kha thakla um ma ma, hun zosia ziagual kha hizing leh ti nop um tun tun mai ahi. Pathian tawh kinai ah um a nawp dan he ngal ah bangziaka gamlat kha sek I hi diam?

I. Pathian tawh kinai ah um daltu:

I hinkhua ah ei hechian pen te chu I kinaipi I kivoppi I muan ma ma te ahi sek ui. I doi leh doilo tite, I umchan, I khawheidan tite ei hesuak ma ma uh ahi. I kam in gen khel khel lo le hinle I umchan leh tawidan a kipat I gen nop a hethei sek uh ahi. Amau in ei hechian ua enle amau I hechian ahi. Amau sang ah ei hechian zaw pakhat bep a um in zia chu I Lalpa Pathian ahi. Pathian hile I hetchian zawlo zia kha ah muang ngamlo kha sek kichi maithei ahi.

Pathian tawh kinai ah um ei daltu khenkhatte:

1. Eima tisa nopna hatzaw: *Social Media* – Tulai chu zingkal I thaw leh Bible vak sim phot ka ahiloleh pauchapna vak nei phot ka ti sang in – Smartphone ki hawl masapen, WhatsApp ah bangthu a um dia aw?? Lawite'n banggual status a kawi diam uh aw?? tite hin lungthim kaimang zaw ding in ginchat a um hi. Khenkhat vang vang dakkal tin ah WhatsApp, Instagram tite ah status update zing theile um nalai. Smartphone nei zosia la Youtuber hivek ta hileh kilawm phial. Lim kilak ding, video lak ding, youtube ah view bangzat a um ta em? tite ah buai zota. Ziagual thilte hin I lungthim teu a luadim in a kaimang ziak in Pathian tawh kinai ah um ding ei daltu ahi sek ui. Social Media hi a hoilo mawng mawng ahi diak puai.
2. Lungkham, haksatna leh beidonna'n ei luadim: Lungkham talua Pathian kona chang helo... Pathian tawh kinai ah um sang ah, I thil tuakteu ziaka Pathian bang le ngaw nuam hial ki um maithei nalai ahi. I kipakna zosia leh daumna, haksatna zosia ah Pathian ngaw thei hilo ahi. Ei bawl khial ziak le a hi maithei, I kiang leh kîm te bawl khial ziak le hithei ahi. Thil phalo I tuak zosia eima phatlo ziak, bawl khial ziak le ahi khel khel diak puai.

Nang leh kei ding in I thiltuakteu hi haksma ma ma, beidon um ma ma ahi, kuama I thiltuakteu chung a hin kipâk ma ma chu ki um puana. Ahinla, zia haw zosia sanga lianzaw Pathian nei I hiu ti hetmil lo ding ahi. English la khat in, “Bigger than all my problems, bigger than all my fears; God is bigger than any mountain that I can or can not see. Bigger than all my questions, bigger than anything; God is bigger than any mountain that I can or can not see. (G. Jensen)” Ka buaina zosia, ka launa zosia leh thil zosia sang ah lianzaw, ka dawtnate zosia sang ah lianzaw. Pathian chu tang liantak muthei leh mutheilo te sang in le a lianzawi.”

Vellore Christian Hospital mun khat ah zia thu hi a kitak hi, “***Pathian kiang in la haksatna letdan genlo in, la haksatna kiang in la Pathian banggual tuk ah lian ahem gen zaw'n.***” Mi khat in ama thiltuak chu midang te thawk sang ah haksma zaw in a gen sek hi, midang haksatna tuakte'n le ziagual chun a gen chiat tho uhi. I buainate

ei a ding ah lian ma ma gual ah kilang maleh, a sanga lianzaw a um zing in zia chu Lalpa Pathian ahi. Pathian chu I buaina teu sang ah lianzaw ahi bep hilo in ei nusia ngailo **Immanuel** ahi, zia chu “Pathian I kiang un a um hi” tina ahi ti I het sau ahi.

Ziaziakchun, Pathian tawh kinai ah um ding ei daltu umte chu Ama tawh te in neu talua ahi, Ama hechian le hin ziate chu zo thei ding I hi zia ding a chun banggual in pan la la diam?

I. Pathian tawh kinai ah um:

Factory ah nasem khat sùn an nek kichawl hun cheng leh, a kiang nai ah Biak In ah va lut in Pulpit mai ah ding in a muk a phun chup chup sek hi. Bang gen ahi dia aw tia a ngai guk ua leh, “Hello Jesus, I am Jim” a tisek hi a tiu. Khatvei chu a nasepnau factory chu hung kang in a liam tamtak a um ua Damdoi In ah puak tung ahi nung un a peng peng tamai ua nisin leh buaina a siam zing sek uh hi. Ahinla, Jim chu a kisukkhakna khok beklo guala a gel ziak un Damdoi In ah a pui vak puau a, nithum zaw in a pui bep uh hi. Ama Damdoi In ah a hung puihut nung un nisin ah a la peng peng sekte kha a thip veng veng tau ahi. Bangziak ahi dia aw tia a kan chian ua leh, nisin leh Jim sùn an nek kichawl hun ah Biak In ah a pauchap sek hun kha tawh kituak in Jesu a kiang in a hung sek a, “Hello Jim, I am Jesus” a hung ti sek hi. Ziaziakchun, a kiang kìm ah umte chunle a mù ah, zia kipat chun a thip veng veng tau, a ki ti.

1. Bible sim zing leh pauchap zing: Pathian tawh kinai ah umna ding in Bible sim zing leh pauchap zing a poimaw hi. Pathian tawh kizop zing na ding ahin Pathian thu Bible sim zing a ngai hi. Thagaulam an ahi ziak in nisin ah sim zing a ngai hi. Chuleh, **lekhabu dang dang** I thagaulam ei chawm thei di sim zel a poimaw hi. Ei sang ah ala masa zawte’n thil ala tuak teu kipat ei â ding ah ki tilkhona, ki sukhatna pang thei ahi.

Bible sim zinglo/sim khalo ah Lalpa tawh kinai umtheilo, thagaumi ahiloleh Pathianmi ahi ti umtheilo ahi. A um tak inle bukim zolo

hiding ahi. Pauchap khalo ah Pathian tawh kinaina ding lampi dang umlo ahi. I Lalpa Jesu khale pauchap zing mi ahi.

2. Keima ah um zing un la, keima le nangmau ah um zing ing ka (Jn. 15:4).

Joseph kha Pathian tawh kinai ah um zing a hi zia in, haksatna, beidonna a tuakte kha a kizaw sak ngailo ahi. Khoitak mun in um maleh, mun haksa leh a nuam inle Pathian tawh kinai in a um zing thei hi. Haksatna leh beidonna a tuakte khan ama a zo puau hi. Joseph in a thiltuakte kha kizaw sak hileh, kingaisia tak ah um intin khoitak ahem ah mangthai in a chanchin kha kigen zawm talo ding ahi. Himaleh, a kingaisia pua, Pathian tawh kinai cha a um zaw a hi.

Daniel leh a lawite khale, a thiltuakteu ziaka khan a kingaisia ziang puau a, Pathian tawh kinai na'n a mang zawu ahi. Nisin leh pauchap in a um zawu' ahi.

3. Pathian tawh kinai ah umte chu a thamuang ua, a beidong sia ngai puau.

Thamuanna ka nutsia piak la hiu; keima thamuanna ngei chu ka hun piak la hiu; khawvel in a hun piak gual in ka hun pia puai. La lungthim uh lungkham ki'hen la, lau le lau diak ki'hen. Johan 14:27

Pathian tawh kinai ah umte chu a puksia ngai puau.....

I ho Pathian tawh kinai ah um theina ding in kalbi banggual la la sek em? La thei nailo la hi zaw em? Lungthuai lo ah Ama tawh kinai ah um thei ding in ei maljawl chiat ta hen!

I ko phat si'n leh naicha um zing, LALPA I Pathian uh gual hi, kua nam inle pathian dang a nei kha ngai him him ua a hem? Dan Lekhabu 4:7

HILLTOWN RCG KOCHUAM REPORTNA

Manipur gam buainan ahun sukkhak RCG kochuam members atam zaw Lamka lam hun zuan ah hung zam te Relief camp apat inn lua dia hung um dawk inkuan khen khat in Hilltown RCG Kochuam ah min kikhum ah kochuam hun belte min list anuai ah gual hin taklat ahi.

- | | | |
|--------------------------|---|--------------|
| 1. Pa Ginminthang | - | Mualkonbung; |
| 2. Pa Pauginlal | - | Mualkonbung |
| 3. Pa Pauginlun | - | Mualkonbung |
| 4. Pro/Pastor St.Lianboi | - | P.Gamhawi |
| 5. Pa Veven | - | P.Gamhawi |
| 6. Pa Hegin | - | P.Gamhawi |
| 7. Upa Nekkam | - | S.Kanan |
| 8. Pa Alum | - | Game village |
| 9. Pa Tongnek | - | Kamuching |

KIPAK THU GENNA

Zion Thusuak subscription fee hun plate chungin kipak thu ka hun gen u ahi.

July-August thasungah fee hun pi ate

- | | | |
|---------------|---|-------------------------|
| 1. Nu Ngailun | - | Lingshiphai – Rs, 150/- |
| 2. Pa Isak | - | HQ veng - Rs, 100/- |

Board members ZT

H E T S A K N A

Mimal kua tawbang Kochuam sungah sawm ah khat piatheilo, chuleh Zion Thusuak lakman hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

- ❖ Account Name : Revival Church of God
- ❖ Account Number : 11343704608
- ❖ Bank Name : State Bank of India
- ❖ Bank Branch : Churachandpur main branch
- ❖ IFSC : SBIN0006182
- ❖ Branch code : 6182
- ❖ MICR Code : 795002504

ZION THUSUAK LIFE MEMBER

- 1) Upa Songlianthang Vaiphei

ZION THUSUAK PATRON MEMBER TE

- 1) Electeded Upa Lalthang, Pakeng veng
- 2) Nu Niangneu, HQ Veng
- 3) Nu Lily, T.Munjang
- 4) Nu Samboi Vanghoiphai
- 5) Pu GL Muana Neitham, Gochinkhup veng
- 6) Upa K.Kama HQ veng
- 7) Pu SL Kamlal Vaiphei, L.Vaiphei veng, Imphal
- 8) Upa Singlet, B.Phaicham

- ❖ Life member dingin 5000/- ahi. -Editor, Zion Thusuak Board
- ❖ Patron members kum 3 (thum) 2020 apat Rs 1,000/- hita ahi.

COLLECTOR/MAGAZINE AGENT:

- | | |
|---------------------|--------------------|
| 1) Tv. Douminlun | Hilltown |
| 2) Tv. Lalroman | T. Munjang |
| 3) Pa Paelim | Kangvai |
| 4) Upa Tongjang | Imphal |
| 5) Upa Khailiankham | Nakhujang |
| 6) Upa Manglun | S Elimphai |
| 7) Upa Liankhai | S Kanan |
| 8) Pa Mangminlun | Gawtangkawt |
| 9) Pa Khamneu | Heirokland |
| 10) Tv. Hauginlian | Bewlahland |
| 11) Upa Mamang | Mualkon |
| 12) Upa Nekpu | Zordanphai |
| 13) Pa Ts Boipu | Mantripukhri |
| 14) Pro Pastor | Lianboi P. Gamhawi |
| 15) Upa Lalla | L. Vaiphei Veng |
-



Pa Alum te Inkuan ve na



Nu Mary te Inkuan ve na



Pa Veven te Inkuan ve na



29th-September-
2023 ni ah
Hilltown RCG
Center Church
mun ah RCG
General standing
meeting nei pet
ahi



Pa Pauginlun gte
inn vena



Pro Pastor te
inkuan vena

RNI Read. No. 34293/80

BOOK POST

STAMP

To,

.....
.....

If Undelivered, Please return to:

The Editor

Zion Thusuak

RCG Head Office

Thangzam Road, Hilltown, Churachandpur, Manipur

PIN – 795128, P.O. Box – 91

Email: rcgmission@gmail.com

Website: revivalchurchofgod.org

Contact: +91 9612652209 (Exe. Secy.)